

# لیکھاں دی پھلواڑی

پنجابی شاعری

عمرانہ مشتاق



جگ دے کولوں پنڈ سِراں تے لے لینے آں دُکھاں والی  
اسیں تاں آپ ای اپنیاں لیکھاں اندر گنجمل پا لینے آں

لیکھاں دی پُھلواری

## انتساب

اپنے سوہنے پنجاب دے

صوفی شاعراں دے ناں:

جہاں بھائی چارہ امن تے پیار دے راگ الہ پے

مائی سارا جگ چُپ اے جے اوہنے چُکی اُت

میرادل کیہہ دھڑکیا سارے جگ وچ پے گیا شور

# لیکھاں دی پھلواڑی

(پنجابی شاعری)

ضابطہ

سبھے حق شاعرہ دے لئی

پہلی وار	:	اپریل ۲۰۰۸ء
تعداد	:	۵۰۰
ناشر	:	محمد اکمل اویسی پیرزادہ
ٹائٹل	:	حمدان گرافکس، لاہور
چھاپہ خانہ	:	الاولیس پرنٹرز لاہور
کتاب دا نمل	:	۱۸۰/- روپے

عمرانہ مشتاق

کتاب ملن دے پتے:

- ۱- محمد اکمل اویسی پیرزادہ - القرطبہ مارکیٹ ۵ فیروز پور روڈ، لاہور 042-7575836
- ۲- 4-A ڈاکٹر زکالونی، علامہ اقبال میڈیکل کالج، لاہور

الاولیس پبلی کیشنز، لاہور



## فہرست

- وارث شاہ (نظم) ۳۸
- عشق اسمانے نکیاں لائیاں ۳۲
- مینوں کالہ دی خبر سی کائی، عشق دا چاء وی لیہہ جاند اے ۳۴
- ہولے ہولے جد سینے وچ سدھراں پیر کھلار لے ۳۶
- کہوں دساں (نظم) ۴۸
- سیانی گل (نظم) ۵۱
- جے آپ مر گیا، سانہوں وی مار دتا اے ۵۳
- کدی نہ جیاتی وچ زہر کوئی گھولے ۵۵
- پیار چاہینیاں گجلاں پا کے کیہہ لبھیا ۵۶
- پلکاں اُتے ہنجاں والے دیپ جلانے آں ۵۸
- اپنا آپ دکھانا کاہنوں ۶۰
- راناں تے رنگ چڑھ گیا یا داں دے رنگ دا ۶۲
- مہکدے ساہواں داسرناواں (نظم) ۶۴
- لاء لئی عشق نے سانجھ تے فر چپ کر جا کڑیے ۶۶
- کیدو کے ددمن نہیں (نظم) ۶۸
- ویلے دا پر چھاواں (نظم) ۷۱

- کجھ اپنے بارے ۱۱
- دُعا ۱۵
- نعت ۱۷
- رباتوں ایس آکے ہُن کھول دلاں دیاں تالیاں نوں ۱۹
- ویہڑے وچ سیندور (نظم) ۲۱
- کوڑھی شام دا بدل (نظم) ۲۴
- مری ونگاں دا چوکھارنگ (نظم) ۲۶
- شاہ حسین دی گل (نظم) ۲۷
- نویں تے پرانی نسل دا دکھ (نظم) ۳۱
- ناں کوئی مچدا بکھے وانگ (نظم) ۳۲
- آڈھے رستیوں اپنی کنڈلکا کے مڑ نہیں جانی دا ۳۴
- ہٹ ہٹ نکال آل دوالے ۳۶

- عشق دی مٹکی مار کے اوہنے کڈھ لینی سی جان ۷۳
- جیہڑے لہہ ہوں لہو دیندے سن اوہ سہر جتے ڈیہہ گئے نیں ۷۵
- ایہہ ساڈے ہمسائے نیں تے ماں پو جائے نیں ۷۶
- ایہناں نیں اوڑک مٹک جانا دل دیاں لکھتاں نال ۷۸
- دیوے دی جے تھی تھی لو ہندی ۸۰
- دُکھاں نال ایناں بھر گئی آں ۸۲
- مٹک گیا بھاویں پنیڈا ساڈیاں ساہواں دا ۸۴
- پنڈ عملاں دی کھولے کون ۸۶
- کیسا عشق تے عشق چھاوڑک مرنا پیندا ۸۸
- غیراں نال جے رل مل جائے اپنیاں نال وگاڑی دا نہیں ۹۰
- ہجر دے غم تے پیار دے دُکھ میں کیہہ دساں ۹۲
- طعنے مار کے ماریا کنیاں ہیراں نوں ۹۴
- خورے کیہڑا ویر کمایا مار کے دل وچ گھنڈ ۹۶
- کیہہ ہو یا جے پے گئے نویں پوڑاے نیں ۹۸
- ویکھیں کدھرے ودھ نہ جاوے دُکھا پنیڈا ہور ۱۰۰
- ماڑی قسمت دے دیندی اے غمراں دے کلاپے ۱۰۲
- حق سچ دیاں گلاں کر دے ساں حق سچ داماں ودھایا سی ۱۰۴
- وچا ردی گل (نظم) ۱۰۶
- اک وڈی طاقت دے ناں (غزل جی نظم) ۱۰۷
- ماں (نظم) ۱۰۹
- تین شعر ۱۱۲
- نویں ویلے دی قید (نظم) ۱۱۳
- پیار محبت دی آگ اندر بلدی جاواں میں ۱۱۵
- تین شعر ۱۱۷
- گیت ۱۱۸
- گیت ۱۲۰
- ناک جی (نظم) ۱۲۲
- پہلی پہلی وار ہجر دا بھانیر دل وچ بلایا ۱۲۴
- شام پوے تے پیار دی پیڑ پرانی ہو کے بھر دی اے ۱۲۶
- اپنے دیس لئی کجھ شعر ۱۲۸



## کچھ اپنے بارے

پچھلے وقتاں وچ جد کسے نوں بد دعا دیتی جاندی سی تے اوہنوں کہیا جاندی سی:

”جاتیوں تیری ماں بولی بھل جاوے“

اپنی اپنی ماں بولی بولن والیاں نوں سچ پچھو تے بہت سی پیار ہوندا اے۔ بند بھائیوں کتنا لکھ پڑھ جاوے کتنیاں بولیاں سکھ لوے پر جو مزہ اوہنوں اپنی ماں بولی وچ ملدا اے اوہ کوئی ہور زبان نہیں دے سکدی۔ ایس لئی پئی جیہڑے لفظ مال ماں والفظ لگ جاوے اوہ تے اُنج ای ہڑا سوہنا ہو جاند اے بھائیوں دھرتی ماں ہووے بھائیوں ماں بولی تے اللہ نہ کرے ساہنوں ایہناں چوں ایہہ شہد توں ودھ کے مٹھا لفظ بھل جاوے۔ تے ساڈی پچھان ای نہ رہوے۔ ایس لفظ نوں بھلن دا مطلب تے ایہو ای اے پئی اسیں اپنے آپ نوں بھل جائیے تے جیہڑا بند اپنے آپ نوں بھل جاند اے اوہدی پچھان پورے جگ تے کیہہ اپنے گھر دے اندر وی نہیں رہندی۔ گھراں اچھن جیہڑا اردو تے ایس توں ودھ کے انگریزی بولن دا رواج پے گیا اے ایہہ ساڈی دھرتی ماتا توں وکھریا کرن دی پہل کر دیتی اے جد کہ ماں بولی تے دھرتی ماں انساناں دی پچھان کرائدی اے تے اوہناں دا بہت وڈا سہارا ہوندا اے۔ جے ایہہ نہ ہووے تے ساڈی گل کوئی وی سمجھن والا نہ ہووے تے ماں کوئی ساہنوں پیار دین والا ہووے۔ پرتھ تھے تاں اسیں بہت کچھ وکھ رہے آں۔ ساہنوں ساڈی ماں بولی تے دھرتی مالوں وکھ کرن دے لئی انگریزی زبان نوں مہذب تے وڈی سوسائٹی دی زبان قرار دے کے ساڈے بالاں نوں انگریزی پڑھائی جا رہی اے تے ایس پڑھائی دی اُچیائی تے وڈیائی دا آہر کرن لئی انگریزی زبان وچ اپنے بالاں مال بول چال دا رواج عام کیتا جا رہیا اے بلکہ کرای دتا گیا اے۔ سچ پچھو تے میں انگریزی زبان دی مخالف نہیں بلکہ اپنی ماں بولی لئی کسے وی زبان دی مخالفت نہیں کردی کیوں جے میں جان دی

آں کہ اُچی تعلیم لئی تے نویں زمانے دی ترقی نوں ویکھدیاں ہو یاں ساہنوں انگریزی ضرور پڑھی چاہی دی اے۔ لے ہور زبانوں وی سکھنیاں چاہی دیاں اسیں۔ پر ایہہ اے مطلب نہیں کہ اسیں اپنے گھراں تے اپنی بولی جانن والیاں لوکاں تے دھرتی دے وسیکاں مال وی انگریزی بولی بولے تے اپنی ماں بولی (پنجابی) نوں ایس لئی چھڈ دیئے کہ ایہہ اُن پڑھاں دی زبان اے۔ جے سچ پچھو تے کوئی زبان ان پڑھاں دی نہیں ہوندی تے ہر زبان اوس ویلے تیکر اُن پڑھاں دی زبان ہو سکدی اے جے اوس زبان وچ تعلیم ماں دتی جاوے۔ ایس گل نوں ثابت کردیاں ہو یاں میں ایہہ آکھناں چاہواں گی پئی اک زمانے وچ انگریزی وی اُن پڑھاں دی زبان سی ایس لئی کہ ایہہ جہاں دی زبان سی اوہ اک زمانے وچ تعلیم تے ترقی توں بہت پچھے سن۔ جدوں اوہناں نے ایس گل نوں سمجھ لیا کہ تعلیم ترقی لئی بہت ضروری اے تے اوہناں نے پڑھنا شروع کر دتا پر اپنی ماں بولی (انگریزی زبان) وچ کسے غیر دی زبان وچ نہیں۔ فیروکھدیاں ویکھدیاں ایہہ زبان اپنی پڑھی لکھی ہو گئی کہ دو جیاں نوں وی ایہہ دے ول دھیان کرنا پے گیا۔ فیروکھدی اہمیت ایویں نہیں بن گئی۔ ایہہ سمجھ جاندے نیں پئی ایہہ کم کسراں توڑ چڑھیا۔ اصل گل ایہہ آ کہ ایہہ حکمراناں دی زبان بن گئی تے حکمرانی دے زور تے ساری دنیا وچ عام ہو گئی۔ ایہہ کم تے کسوی زبان دے ذریعے ہو سکدا اے۔ ایس توں پہلا عرباں (مسلماناں) دی زبان عربی تے فیرقاری نے کیتا۔ ایہناں زبانوں دے بولن والے جتھے جتھے حکمرانی دے جھنڈے لگدے گئے زبان دی مال مال عام ہوندی گئی۔ انگریزی نے وی ایہو کم کیتا۔ پر جیہڑیاں سمجھ دار قومیں اوہناں نے کسے غیر (حکمراناں دی) زبان نوں ایس لئی نہیں سکھیا کہ اوہناں دی اپنی زبان مالوں چنگی سی بلکہ اوہناں نوں ایس لئی سکھیا کہ ہندو مال اوہناں نوں سمجھن دا قول آ جاوے پر ساڈا طور طریقہ کچھ ہور ہو گیا اے۔ اسیں ایہہ زبان سکھ کے اپنیاں اُتے حکمرانی دے خواب ویکھن لگ پئے آں تے عام لوکاں تے اپنے آپ نوں وکھرا ثابت کرن لئی ایہہ زبان بولن لگ پئے آں۔ جے ایہو کچھ ہوندا



پچھدا اے کہ گھروچ کیہڑی زبان بولدے او تے اوہ کہہ دیندے نہیں کہ ساہنوں ساڈی ماں ڈانٹ ڈپٹ پنجابی زبان وچ ای کردی ای۔ پر ایہدا ایہہ مطلب نہیں کہ پنجابی زبان ڈانٹ ڈپٹ لئی ہوندی اے۔ میرا مطلب اے کہ بندہ کہتا وی زمانے دے رنگ وچ رنگیا جاوے تے دو جیاں زبانوں نوں نویں زمانے دی لوڑ سمجھ لوے (انج ہونا تے نہیں چاہی دا) جدوں بے اختیار ہوندا اے تے اپنی زبان وچ ای گل کردا اے ایس لئی کہ اوہنوں اپنی زبان وچ گل کردیاں کوئی اوکڑ نہیں آندی۔ شاعری تاں فیر شاعری اے۔ ایہہ اپنی زبان دارنگ آپ دکھاندی اے پر عام بول چال وچ گلہاں کردیاں ہو یاں وی جد کوڑھیاں گلہاں ہوں لگ پین۔ تے اصل پنجابی دارنگ چوکھا ہوں لگ پیندا اے۔

۶۔ تھیں میں ایہہ دعویٰ تے نہیں کردی کہ میں پنجابی دے اصل رنگ نوں اپنا لیا اے تے ایہدے ادبی رنگ ڈھنگ نوں پورا پورا سمجھ لیا اے۔ ہوسکدا اے کہتے کہتے میرے شعراں اندر ساڈے نویں دور دی بول چال دا اثر وی آ گیا ہووے (جیہڑا میں سمجھدی آں فطری ہوندا اے) پر فیروہ میں ایناں ضرور آکھاں گی کہ میری شاعری دی زبان تے رنگ ڈھنگ پنجابی اے۔ اوہیو پنجابی جیہڑی میں اپنے گھروچ بولدی آں۔ کدی اپنی ماں مال بولدی ساں، کیوں جے ماں نے مینوں ایہو بولی سکھائی سی۔ دو جیاں اک دو بولیاں نوں سکھیں لئی تاں میں سکول لے گئی ساں۔ پر سکول لے جا کے میں اپنی ماں بولی نوں نہیں بھلیا۔ ایس لئی کہ ایہہ میرا فخر اے۔ میرا مان اے تے ایس مان نوں میں کدی وی نہیں کواسکدی۔ فیروہ میں رب کولوں دعا کردی آں پئی مینوں اپنی ماں بولی نہ بھلے۔ لہہیو میری پچھان۔ تے میرا مان اے۔

عمرانہ مشتاق

رہیا میں ڈرنی آں اوس ویلے توں جدوں ساڈے پیراں توں دھرتی کھچ لی جاوے گی۔ اللہ نہ کرے ساڈے پیراں توں دھرتی کھچ لئی جاوے۔ آمین۔

میری والدہ صاحبہ سیدہ سیکڑ فرحت اردو تے پنجابی دو آں زبانیں اچ شاعری کردیاں سن۔ اردو ماں پنجابی وچ اوہ زیادہ شعر کہندیاں سن ایس لئی پئی ایہہ اوہناں دی وی ماں بولی سی۔ تے ایہدے وچ شعر کہندیاں ہو یاں اوہناں نوں کوئی اوکھا نہیں سی لگدا۔ اوہناں دی بہتی شاعری ایس بولی وچ اے تے خاص کر اوہ نعت لکھندیاں سن تے نعت نوں اپنی زندگی داسر مایہ جان دیاں سن۔۔۔ مینوں یاد اے پئی جدوں میں چوتھی جماعت وچ پڑھدی ساں ایہہ اوہدوں دی گل اے، سکول توں گرمیاں دیاں چھٹیاں سن۔ میری امی دی عادت ہوندی سی کہ ایس اوہدوں تیکر ناشتہ نہیں ساں کر سکدے جد تیکر قرآن پاک داسبق اوہناں کولوں نہیں ساں لے لیندے۔ جے کدی ایس توں ہٹ کے ہوندا تے اوہ ساہنوں ناشتہ نہیں سی دیندیاں، کیوں جے میری والدہ صاحبہ قرآن پاک دی حافظہ دی سن تے قاریہ وی۔ اک دیہاڑے میں ایویں ضد وچ آ گئی کہ سپارہ پڑھن توں پہلاں ناشتہ کراں گی، پر والدہ صاحبہ نے ساہنوں اجازت نہ دتی تے سختی مال حکم دتا کہ پہلاں سپارہ پڑھ فیر ناشتہ ملے گا۔ میں مزاح ہو کے کوٹھے تے ڈنکی ہوئی منجھی تے جا کے لمے پے گئی تے روندی جاواں تے مال پنجابی وچ اوس ویلے دی سمجھ کارن مٹے بھجے شعر پڑھنے شروع کر دتے۔ اوہ شعر کیہہ نہیں بس مینوں ایہو یاد اے کہ کچھ ایسراں سن:

اے خاتون جنت بی بی صاحبہ میں رورو حال و نجاواں

سن عرضاں میریاں۔۔۔ کر د و مرضاں میریاں

میں تاں رورو حال و نجاواں

ہنس تاں میں وی انج ہوندا اے۔ پی ایچ ڈی ایم فل کرن توں بعد وی جدوں کدی دکھی ہوئی آں اپنا حال اپنی ماں بولی پنجابی وچ ای بیان کیتا اے تے ہنس وی جے کوئی میریاں بالاں کولوں



تیرے درگا ہور نہ کوئی، توں سب توں زور آور  
 خورے کاہنوں لوکی اتھے نگڑیاں کولوں ڈردے  
 سوہنیا سائیاں میرے دل دیاں بدل دے ہُن تقدیراں  
 کتھوں تیکر ویکھی جاواں غم دے بدل وُردے  
 مائی سوہنا رب جے لاہوے گاتے لیہہ جاوَن گے  
 بے عقلاں جے پا دِٹے نیں عقلاں اُٹے پردے

## دُعا

سوہنیا مولا، سچا ربا ! اپنی رحمت کر دے  
 میرے سچے پیار دعاواں والا تھوٹھا بھر دے  
 توں بے پروا، تینوں کوئی مَنہ یا نہ مَنہ  
 سچی گل اے، تیرے باہجوں کسے دے کم نہیں سُر دے  
 رات دی بکل وچوں سورج نوں جے توں اے کڈھیا  
 دل دے ویڑے وی توں ہُن خوشیاں دا چائن کر دے  
 جگ دے ایس سمندر اندر دُب گئے قہراں والے  
 جیہڑے تیرے قہر توں ڈردے، اوڑک اوہیو تر دے



کیہہ صفتاں اوہناں دیاں لکھاں اتھے آ کے مُک جاندے  
 حرفِ خیالِ تفکر سارے بڑے بڑے داناواں دے  
 غارِ حرا وچ اوہناں دے مُکھ نے جو چائن کیتا سی  
 اوہدے نال ای جے سارے منظر اپنیاں راہواں دے

## نعت

پاک نبی دے سوہنے ناں تے مہکے حرفِ دعاؤں دے  
 ذکرِ حضوری آیا، روشن ہو گئے درتے ساہواں دے  
 آپ دے سوہنے ناں دے صدقے میری بخشش ہووے گی  
 حشر دیھاڑے لیہہ جاون گے سرتوں بھار گناہواں دے  
 اک دن میں اوہناں دے دے جواں تے فرمہکن رنگ  
 میرے دل دیاں سدھراں دے میری اکھیاں دیاں چاہواں دے

جان گنواںی پیندی اے منہ دی کھانی پیندی اے  
عشق دا دل کیہہ آوے گا پڑھ پڑھ عشق مقالیاں نوں

کیہہ کچھاں کیہہ دساں میں کیہہ روواں کیہہ ہساں میں  
پیار دا کم اچیرا اے ملیا کرماں والیاں نوں

کنڈیاں ہتھ اُسارے نیں راہواں پھل کھلارے نیں  
مائی کدی نہ دیکھیا سی میں پیراں دیاں چھالیاں نوں



ربا توں ایس آ کے ہُن کھول دلاں دیاں تالیاں نوں  
آپ وی رستے بھل گئے رستے دسن والیاں نوں

ڈھورے بھورے جسے نیں سچ جہاں توں رُسے نیں  
ہتھ ودھائی پھر دے نیں سچ دے زہر پیالیاں نوں

مڈھاں دے اندراتے نیں کیوں ودھ کم ذاتے نیں  
کدھاں لاء کے پکھن گئے ایہہ اکھاں دے جالیاں نوں

بلدی اگ وچھوڑے دی دل دا دارو بن گئی اے  
ہجراں ساڑھ سواہ کیتا اوڑک درداں والیاں نوں

میں کیہہ دساں آٹا بولے  
بھید دلاں دے سارے کھولے  
وَن سَوَنے دُکھڑے پھولے  
یاد کراں تے جسا ڈولے  
پاوے ہور فتور

میرے دیہڑے وچ تندور

اک ہتھ پیڑا تھپدا جاوے  
دو جا اگ نال کھپدا جاوے  
اگ پھروئے تپدا جاوے  
ورد دھوئیں دا جپدا جاوے  
اکھیں چڑھیا بور

میرے دیہڑے وچ تندور

ویہڑے وچ تندور

پچھ نہ کڑیے میتھوں ایہہ گل  
سرتوں نگھ گئی پانی دی چھل  
پانی دل وچ ہنجواں گنجل  
بن گئی یاد غماں دی بھیل  
بھیل اندر نور

میرے دیہڑے وچ تندور

نور دلاں دا چانن ہویا  
میں چانن دا ہار پرویا  
بھار مصیبتاں والا ڈھویا  
فیروئی اکھ نے درد نہ رویا  
درد بڑا مجبور

میرے دیہڑے وچ تندور



## گوڑھی شام دا بدل

چار چو فیرے رُوپ فضاواں نے کج ہو رای دھار لیا اے  
میرے دل دارنگ ہواؤں اج سمندر پاروں لے کے  
آگیاں نہیں

نمے نمے منظر میریاں اکھیاں دے  
در و سمندر بندے جاندے نہیں  
میرے جسے اندر لہو وی پانی ہوندا جاندا اے  
اوہدیاں چھلاں تیریاں یاداں دے زخماں وچ  
انج کر لاٹاں پاندیاں نہیں  
جیویں کوئی شام دا پنچھی

ویہڑے وچ تندور کیہہ آیا  
آٹے نال آٹا ٹکرایا  
ہاسیاں وی گج رنگ دکھایا  
گلیں باتیں چن چڑھایا  
ہسیا رب غفور

میرے ویہڑے وچ تندور  
اک نے اک دے ہتھنوں گھٹیا  
دوجی نے اک پٹرا سٹیا  
روٹیاں والا میلہ لٹیا  
ہاسا وچ چنگیرے پھٹیا  
ہاسا رب دا نور

میرے ویہڑے وچ تندور

## مری ونگاں دا چوکھا رنگ

مری ونگاں دا چوکھا رنگ

میرے دل دیاں سدھراں نوں کج ایویں جگاندا اے

کہ جیویں درد ہاڑے رات دی اکھیاں دے ہڑ اندر

تو دے شوکدے دریا جگاندا اے نہیں

مری ونگاں دا چوکھا رنگ

تیری یاد دے رنگاں نوں چوکھا کر دا جگاندا اے

جے میرے جاگدے نہیں دن تے میرے غم دیاں راتاں نوں وی

چوکھا جگاندا اے

ایہہ مری گل نہیں سن دا، بس اپنی گل منانا اے

تری نگی جی گل تے کئی گلاں بنانا اے

مری ونگاں دا سوہا رنگ چوکھا ہوندا جگاندا اے

اپنے گھرتوں دُور تھلاں وچ

گوڑھی شام دے بدل پٹھیاں

اپنے وچھڑے سنکیاں ساتھیاں نوں کر لانا اے

اوہدے دل دارنگ وی گوڑھے شام دے بدل وانگوں

گوڑھا ہوندا جگاندا اے



ایویں کون تقدیر نوں تولدا اے  
 شاہ حسین اوتھے بھید کھولدا اے  
 جتھے کوئی ناہیں سچ بولدا اے  
 تیرا عشق کسے ان بھول دا اے  
 عشق ہیریاں نوں مٹی رولدا اے  
 جنہوں ویکھ آسمان وی ڈولدا اے

شاہ حسین دی گل ناں سُن کڑیے  
 شاہ حسین تے درد جگاوند اے  
 جدوں درد وچھوڑا ستا وندا اے  
 ہاڑے پاوند اے کرلا وندا اے  
 کدی ہجر دی سولی چڑھا وندا اے  
 کدی دُکھاں دا سالن کھوا وندا اے  
 بالن آہیں دے نال اگ لا وندا اے  
 تھیا تھیا اوہ عشق نچا وندا اے  
 شاہ حسین دی گل ناں سُن کڑیے

## شاہ حسین دی گل

شاہ حسین دی گل ناں سُن کڑیے  
 اوہدی گل دا مان نہ مان کڑیے  
 نکل جائے گی تیری وی جان کڑیے  
 شاہ حسین دی گل ناں سُن کڑیے  
 بگے عشق دا روگ اوڑا اے  
 دل اپنا کٹھ مکھڑا اے  
 کسے ہتھ تکرری ساڈے ہجر دی اے  
 اوہدے وچ آسمان دا پلڑا اے  
 شاہ حسین دی گل ناں سُن کڑیے

تیرے ناپ دی نہیں کفنی ہجر والی  
 عشق ہجر چہ ساڑھ سواہ کردا  
 تینوں جین، اوہنوں جان کڈھن دا چاء  
 عشق مار دیندا، نہیں آپ مردا  
 شاہ حسین دی گل ناں سُن کڑیے  
 اوہدی گل دا مان نہ مان کڑیے  
 نکل جائے گی تیری وی جان کڑیے  
 شاہ حسین دی گل ناں سُن کڑیے

شاہ حسین فقیر کبیر ہویا  
 وچ کندیاں لو سریر ہویا  
 ٹٹے دلاں دا ایسا خمیر ہویا  
 سانوں جوڑیا تے لیر و لیر ہویا  
 اوہدے عشق دا روگ اخیر ہویا

شاہ حسین دی گل نہ سُن کڑیے  
 اوہدے عشق دی راہ نگا سوئی دا اے  
 دھاگا ذات تے نین پرین ہویا  
 حق آکھدی آں، سچ بولدی آں  
 سچ بول کے وی کتھے کیہن ہویا  
 جے توں سنیں میتھوں اتھے اج دی گل  
 کیہڑا عشق چہ شاہ حسین ہویا  
 اوہنے سیہڑ لیا اوہ دی درد کڑے  
 جیہڑا درد نہ کسے توں سیہن ہویا



## ناں کوئی نچدا بلھے وانگ

کیہہ پچھدا ایں، کیہہ دساں میں، کیہہ میں لیکوں لائیاں  
 دل دیاں گلاں کیہہ میں آ کھاں، میرے دل دے آ، سائیاں  
 نمیاں، نمیاں اکھیاں اندر پچیاں درد جدائیاں  
 ہجر دے جنگل بیلے ہیراں بلھے وانگ کراہیاں  
 ”بلھے نوں سمجھاؤں آئیاں، بھیناں تے بھر جائیاں“  
 کنہوں تاہنگ اے سولی چڑھن دی، کنہوں چاء مرن دا  
 ریت تھلاں دی پا کے سر تے کنہوں وَل ٹرن دا  
 رنگے کپڑے پا کے اتھے ہر کوئی بلھلا بن دا  
 ہیراں نہیں وی سہیڑ لیا اے رشتہ سوہنے چن دا  
 درد وچھوڑا سہہ لیا اپنا، اکھیاں مار کے ڈھائیاں  
 ”بلے نوں سمجھاؤں آئیاں، بھیناں تے بھر جائیاں“

## نویں تے پرانی نسل دا دکھ

نکے ہوندیاں سب توں وڈا اگواہی رولا ہوندا سی  
 چادر چُک کے ماں دے سرتوں  
 کڈھ دیندے ساں، جیہڑا دھولا ہوندا سی  
 وڈے ہوندیاں کتے ای رولے پے گئے نہیں  
 سوہل دھیاں دیاں سراں چوں دھولے کڈھدے کڈھدے  
 ماپے ہولے پے گئے نہیں

ناں کوئی سچ دی تسبیح پھڑدا، نہ کوئی درد پرووے  
چٹے کپڑے تن تے چاڑھ کئے دل دامیل نہ ڈھووے  
ناں کوئی نچدا بلھے وانگ تے ناناں کوئی بلھا ہووے  
ویلے دا ہڑ سوہنیاں نوں پلسیٹے مار ڈبووے

وچ رسوئیاں ایویں ای ہیراں روئیاں تے کرلائیاں  
”بلھے نوں سمجھاوَن آئیاں، بھیناں تے بھر جائیاں“

میں وی تے فیر اوہدی ساں جے اوہدے وانگ نہ کوئی  
رات دنے اک اوہدے لئی میں پنڈ غماں دی ڈھوئی  
اپنے سینے اندر اوہدے پیار دی تاہنگ پروئی  
”رانجھا رانجھا کردی اک دن آپ ای رانجھا ہوئی“

واہ او میریا سچیا ربّا تیریاں بے پروائیاں  
”بلھے نوں سمجھاوَن آئیاں، بھیناں تے بھر جائیاں“



اڈھے رستیوں اپنی کنڈ لکا کے مڑ نہیں جائی دا  
پورا بھار ونڈائیے جے فر کسے دا بھار ونڈائی دا  
بن جائے گا اوہو اک دن حال تری رسوائی دا  
کسے دے اگے کدی نہیں اپنے دل دا حال سنائی دا  
جھوٹھے لوکی، جھوٹھی دُنیا، جھوٹھے سنگی ساتھی نہیں  
استھے تے ہُن رہ گیا نہیں اِبتار اپنی ماں جائی دا

ٹھنڈے دُہ نوں پھوکاں دے کے دس تینوں کیمہ لبھیا اے  
بھریا بھانڈا وی ڈلھ جاندا اے اوہ جدوں ہلائی دا





بٹ بٹ تنکاں آل دوالے  
 کیمہ کیمہ لوکاں روگ نیں پالے  
 چن دے ڈکرے کر کر ویکھن  
 اُتوں سوہنے اندروں کالے  
 دوجیاں نوں ایہہ کوچے آکھن  
 لاہندے نہیں اکھیاں دے جالے  
 رانجھے نے کیمہ ونجلی پھڑلئی  
 رہ گئی کھلی ہیر سیالے

اوہ تے غیر سی، غیر رہوے گا، اوہ دے تے کیمہ اپنا زور  
 اپنی جان وی اپنی نہیں، ایہہ سارا ساتھ پرانی دا  
 نفرت دا اک بول وی جھل دیندا اے درد کھریںڈاں نوں  
 بھڑکے ہور وی، بلدی اگ تے پانی جنہاں پائی دا  
 سستی کھلے جگان توں مائی چپ رہنا ای چنگا اے  
 اپنی رت بچوئی ہووے تے رولا نہیں پائی دا



ہجر دی اگ بجھاون لئی وی

پیار دلاں دا بالن بالے

اکھیاں وچوں مُک گئے ہنجو

سرگیا تیل تے بُجھ گئے آ لے

درد تھلاں وچ ٹردیاں مائی

پے گئے نیں پیراں وچ چھالے

## وارث شاہ

ایہہ دُنیا کئی کوہچی اے

ترے عشق دی گل وی سُن دی نہیں

ترے پیار دی گل نوں جان سکے

ایہہ دُنیا کسے وی گُن دی نہیں

توں روویں ہیر نمائی تے

جیہڑی ہیر سیال دی جیڑی سی

جسے چر خا کتیا ہجراں دا

جسے پیار دی پونی وٹی سی

اتھھے لکھاں عشق دے ویری نہیں  
 اتھھے لکھاں ہیراں رُل گیاں  
 اتھھے رات دے تارے کیہہ دسن  
 دن نوں وی راہواں بھل گیاں

ترے حرفاں تیریاں سوچاں نہیں  
 جے ہیر دا درد وٹایا سی  
 میرا وی مان ودھا دیندا  
 جے اوہدا مان ودھایا سی

میں بھاویں ہیر سیال نہیں  
 مینوں عشق نے سولی چاڑھیا اے  
 جے اوہنوں ہنجواں ساڑیا سی  
 مینوں وی ہنجواں ساڑھیا اے

اوہ ہیر جیہڑی من موہنی سی  
 توں اوہدیاں گلاں کیتیاں نہیں  
 سدھراں نہیں تیرے دل دیاں وی  
 اوہ تیریاں وی ہڈ بیتیاں نہیں

ترے سُفنے پیار دے سُفنے سن  
 تینوں ہیر دا درد رواندا سی  
 تینوں اندروں اندریں گھن وانگوں  
 رانجھے دا غم وی کھاندا سی

ہُن کیہدے سینے درد ایناں  
 ہُن کیہڑا وارث شاہ ہووے  
 جیہڑا پیار دے رنگ نوں رنگ دیوے  
 جیہڑا ہیر دے دُکھڑے سن رووے

میں ہیر تے ہیراں ہور وی نہیں  
جو میرا حال اوہ سب دا اے  
مینوں میریاں حرفاں رول دتا  
مینوں وارث شاہ نہیں لبھدا اے



عشق آسمانے ٹاکیاں لائیاں  
ہیراں پھردیاں وانگ سودائیاں  
درد کہانی کنہوں دساں  
ڈکیا دل نوں بھیناں بھائیاں  
منزل پاروں اپڑن تائیں  
خورے کیتا کیہہ کیہہ راہیاں  
توں ناں ملیا اکھیاں دے وچ  
فیر اوہو سوغاتاں آئیاں



کملے دل نوں سمجھ نہ آوے  
عشق دی راہ وچ جٹے کھائیاں

پیار وی کتنا گنبا ہویا  
اکھ محبوبی کم جوائیاں

شکھ دی چھاویں بہہ لیندے ساں  
ویٹھے غم دیاں دھپاں آئیاں

تیرے ہاتھ نہ جیوے مائی  
سوہنیا ربا ! سچیا سائیاں !



مینوں کاہدی خبر سی کائی، عشق دا چاء وی لیہہ جاندا اے  
پاتھیاں تھپدے تھپدے اک دن دل نوں تھپنا پے جاندا اے

میرے اپنیاں لیکھاں مینوں مار مُکایا، اُنج تے اوہ وی  
میری گلں وی سُن جاندا اے اپنی گلں وی کیہہ جاندا اے

ڈھلدی شے دا مان کیہہ کریے جندڑی والا ایہہ پرچھاواں  
ڈیہندیاں ڈیہندیاں اک دن ٹھدیاں کندھاں وانگوں ڈیہہ جاندا اے

سچی گل جے پچھیں، دل دی گل کدے وی لگ نہیں سگدی  
پیار اظہار وی منگدا، نہیں تے رہندا رہندا رہ جاندا اے

پیار اے بُکھے وانگوں نچدا، جھوٹھ فریباں توں اے بچدا  
پیار تے سِدھا ساوا ہندا، سِدھی ساوی کیہہ جاندا اے  
پیارے لکائیے تے فر مائی گج نہیں بچدا سینے اندر  
پیار اے جیہڑا جُسے اُتے پہاڑ غماں دے سہہ جاندا اے



ہولے ہولے جد سینے وچ سدھراں پیر کھلار لئے  
اپنے پیار دے تیرے نال میں اُچے محل اُسار لئے  
لیکھاں باہجوں گل نہیں ہوندی، لیکھاں تے گل مُکدی اے  
جیہدے لیکھ نہیں چنگے، اوہنیں دُبے گھرے وے تار لئے  
عشق دے بول نہیں بہت ای سوکھے، عشق دا پنیڈا اوکھا اے  
جیہڑا چکے، اوہدے سر توں عشق دے کدی نہ بھار لئے



جان لباً تک آ گئی بھاویں درد کسے نوں دسیا نہیں  
اسیں تاں اپنے سارے ہوکے اپنے اندر مار لئے  
دل دے سچے پیار نوں مائی اکھّاں کدوں لکوندیاں نہیں  
کسے نوں بھاویں گلّیں باتیں کوئی کٹا چار لئے

## کنہوں دسّاں

مائے نی میں کنہوں دسّاں اندر والی گل  
اندر والی گل دسیے تے لیہہ جاندی اے کھل  
مائے نی میں کنہوں دسّاں اندر والی گل

پیار سندیے تھور کے وی نہ ملیا مینوں پیار  
گلّی بیہہ کے کردی رہی میں ایویں ہار سنگھار  
سر توں لنگھ دا جاوے ہجر دا پانی چھلّو چھل  
مائے نی میں کنہوں دسّاں اندر والی گل

عشق دا بھارتے اپنے موڈھیں آپ ای ڈھونا پیندا  
 درد اپنا تے آپ ای ونڈنا، آپ ای رونا پیندا  
 عشق دا بدل وردے ویلے دیندا کوئی نہ ٹھل  
 مائے نی میں کنہوں دساں اندر والی گل

ساہواں سینہ چھاننی کیتا، باہروں ہسن بُکھیاں  
 دل نے کس دے ہاڑے پائے بھید نہ دسن بُکھیاں  
 دس دیون تے کھیہ آ جاندی اوڑک سر دے دل  
 مائے نی میں کنہوں دساں اندر والی گل

دُنیا بڑی سیانی اے تے کملی پیار دی ذات  
 دن وچ نہر مچا دیندی اے پا دیندی اے رات  
 پیار محبت سدھا ساوا، دُنیا چل سو چل  
 مائے نی میں کنہوں دساں اندر والی گل

نکیاں نکلیاں عمراں وچ جے پے جان عشق سیا پے  
 بھار مصیبتاں والے سارے ڈھونئیں سکدے ما پے  
 ایس مسلے دا حشراں تاکیں کڈھیا کسے نہ حل  
 مائے نی میں کنہوں دساں اندر والی گل

ایہنے اڈ پڈ جانا اے

کیہہ پیار نبھانا اے

ایہہ ڈردی ویلے توں

میں ڈردی لیہدے توں

کس در تے جاوے گی

کیہہ رنگ دکھاوے گی

ایہہ نار پٹولیاں دی

دُنیا بڑبولیاں دی

## سیانی گل

ایہہ نار پٹولے دی

ایہہ بھید نہ کھولے دی

ایہہ ڈردی کھیڑیاں توں؟

یا خالی ویہڑیاں توں؟

سانہوں اندر تاڑے گی

ایہہ جھگا ساڑے گی

ایہہ وختاں ماری اے

کیہہ دل توں ہاری اے



جے عشق جان نہ کڈھے تے ایس دھرتی تے  
 دلاں نوں مل کے شریکاں نے مار دیتا اے  
 نویں زخم دا پواڑہ کہتے نہ پے جاوے  
 کھرڈ پہلے زخم دا اُتار دیتا اے  
 توں ایویں کچا گھڑا لے کے ٹر پئی مائی  
 چہاں نے کد کسے سوئنی نوں تار دیتا اے



جے آپ مر گیا، سناھوں وی مار دیتا اے  
 کسے سماج نوں ایناں سُدھار دیتا اے  
 جے ماں نہیں تے بھراواں داماں کیہہ کریئے  
 دعاواں کیتیاں ناں سرتے پیار دیتا اے  
 خدا نے دتی جوانی تے اوہ وی دو دن دی  
 غماں دا چار دناں دا وچار دیتا اے  
 جے مینوں تاہنگ نہیں تیرے کول آون دی  
 ملن دا توں وی تے ویلا گزار دیتا اے



پیار چہ اینیاں گنجلاں پا کے کیمہ لبھیا  
 اُچیاں نیویاں راہواں جا کے کیمہ لبھیا  
 بندہ بندے دا داڑواے کیمہ بندے نہیں  
 پر ایہہ داڑواکھ وچ پا کے کیمہ لبھیا  
 دل دا ورقا فیر وی خالی رہ گیا اے  
 ہجر کتاباں پڑھن پڑھا کے کیمہ لبھیا  
 عمراں دے جگراتے کٹنے پے گئے نہیں  
 اوہدے نال ایس دل نوں لا کے کیمہ لبھیا



کدی نہ حیاتی وچ زہر کوئی گھولے  
 کسے نال کدی وی ناں اُچّا نیواں بولے  
 لبھ جاوے آہر کوئی نویں گل بات دا  
 دُکھ مل جھل سارے اپنے پھرولیے  
 اپنی ات چُک ناں توں اک دن رل کے  
 ہتھیاں دیاں دتیاں نوں دنداں نال کھولے  
 دوجیاں نوں کیمہ والے اسیں وی تاں جھوٹھے آں  
 آپ سچ بولے تے کسے نوں ناں تولے





پکاں اُتے ہنجاں والے دیپ جلانے آں  
اسیں وی کیہہ کیہہ دیکھ سمجھ کے دھوکے کھانے آں

اپنیاں سوچاں اُتے ساڈا چلدا نہیں جے وِس  
چن ول دیکھ کے خورے کاہنوں لُک چھپ جانے آں

تیرا درد وچھوڑا جد حدّوں لنگھ جاندا اے  
اوڑک تیریاں یاداں دی کنڈی کھڑکانے آں

پہلاں لا لینے آ پیار محبت والا روگ  
جے ایہہ روگ نہ جاوے تے دل نوں سمجھانے آں

پیار محبت سُن دے ساں پرہُمن کتھے  
دُکھ دی کفنی گل وچ پا کے کیہہ لبھیا

سُچے موتی مٹی وچ رُل جاندے نیں  
اکھیاں وچوں نیر وگا کے کیہہ لبھیا

تاریاں بھریا ایہہ اسمان تے تیرا نہیں  
مائی چن دیاں آساں لا کے کیہہ لبھیا

اپنے آپ نوں اُچا کرن دی لے کے دل وچ تاہنگ  
کدی کدی تے ہو روی نیویں ہندے جانے آں

جگ نے کدی نیاں نہیں کیتا کمزوراں دے نال  
فیر وی اپنی بنی ایہدے ہتھ پھڑانے آں

بے قدراں دے نال وی مائی کر کے سچا پیار  
سچ پچھو تے اپنی رت وی آپ گنوانے آں



اپنا آپ وکھانا کاہنوں  
جاندا ساک نبھانا کاہنوں

وچ میدانے عشق نبھائیے  
جھاڑ کے پر اُڈ جانا کاہنوں

جتنی ہو گئی تھوڑی تے نہیں  
دل نوں ہو روانا کاہنوں

اپنے آپ نوں ویکھ کے ٹریے  
لوکاں نوں سمجھانا کاہنوں



جتھے بندہ رُل گھل جاوے  
 اوس پاسے فر جانا کاہنوں  
 بھید جے دل دا دسّ اکھیاں  
 چپ دا جندرا لانا کاہنوں  
 مائی اتھرو موتی تے نہیں  
 پلکاں پیٹھ لکانا کاہنوں



راتاں تے رنگ چڑھ گیا یاداں دے رنگ دا  
 پر کیمہ کراں کہ دن وی نہیں ایویں لنگدا  
 جے ایہہ نہیں قصور کسے بھکھ ننگ دا  
 کیوں لیرو لیر ہو گیا کڑتا ملنگ دا  
 سوچاں دی بلدی اگ اے ساہواں نوں ساڑھ دی  
 ویلے دا ناگ روز اے جسے نوں ڈنگدا  
 دساں میں کیمہ کہ جندوی لائی اے اوہدے ناں  
 ویکھے نہ رنگ جیہڑا مرے دل دے رنگ دا

دنیا تے حشر تائیں پھڑاندی نہ اپنا ہتھ  
بندہ جے دل دا درد وی ایہدے توں منگدا  
مائی توں ایہہ تے ویکھ کہ ٹُھدے نہ دل کدی  
شیشے دا حال ویکھ کے پتھر جے سنگدا

## مہکدے ساہواں داسرناواں

میں رات دے گوڑھیاں نہریاں اندر  
ہو راي منظر ویکھے سن  
گج منظر تیریاں سفنیاں دے  
گج منظر تیریاں یاداں دے  
گج منظر تیریاں راہواں اُتے کھلے ہوئے پھلاں دے  
گج ہو روي منظر ویکھے سن  
اوہ منظر مینوں یاد آون تے انج لگے  
جیویں اوہ سارے منظر میرے اُس ویلے دے منظر سن  
جس ویلے کوئی ویلا وی خوشیاں توں خالی نہیں ہوندا



تے خوشیاں وی گج ایہو جہیاں

جہاں اُتے غم دا پر چھاواں وی کدی پیا ناں ہووے

اوہ منظر مینوں آج غم دیاں کالیاں راتاں اندر جدوی یاد آون

تے انج لگدا اے

تیرے غم وچ گھلدی ہوئی جندڑی دے

ہُن جنہے وی ساہ رہ گئے نیں

اوہ مہکن لگ پئے نیں

پر فیر میں غم دیاں کالیاں راتاں ول تھکدی آں

مینوں ایسراں جا پدا اے

ایہہ میرے مہکدے ساہواں اُتے

تیرے غم دا پر چھاواں بے ناں پیندا تے میری جندڑی

کئی بنجر ہو جاندی



لالی عشق نے سانجھ تے فر چپ کر جا کڑیے

دل توں نہیں تے ویلے توں ای ڈر جا کڑیے

عشق دا کم ای کیہہ اے، ایہہ تے کہہ دیندا اے

کچے گھڑے نوں پھڑکے ہتھ وچ، تر جا کڑیے

جھلی ہو کے پھرنا تے چنگا نہیں ہندا

عقلاں والے ڈاھڈے نیں، توں ہر جا کڑیے

اوڑک اک دن تاپ عشق دا لیہہ جانا ای

کملی ہوئی کیوں پھردی ایں، گھر جا کڑیے

تیرا وَر تے تیریاں ماپیاں دی مرضی اے  
توں کیمہ سُن کے لینا، توں اندر جا کڑیے  
دُنیا دشمن پیار وفا دی، حُسن حیا دی  
غیرت نہیں تے زہرای کھا کے مر جا کڑیے

## کیدو کسے دا دشمن نہیں

کیدو کسے دا دشمن نہیں  
کیدو میرا وی دشمن نہیں ہوسکدا  
کیدو کسے دا وی دشمن نہیں ہوسکدا  
کیدو میری عزت دار کھوالا اے  
کیدو سب دی عزت دار کھوالا اے  
میں اوہ ہیراں  
جیہڑی کیدو دی گل من کے  
اپنے گھر دیاں کندھاں تکدی رونی آں



سوچ رہی آں مانی کُلی بیہہ کے میں  
اوہدے ناویں چندڑی لائی کھدے لئی



تے را بنجھن جیہڑا میرے چھوٹے جے دل اندر وسدا اے  
 اُچے اُچے محل چبارے کولوں کسراں اُچا ہووے  
 کیدو جیہڑا ایہناں محل چباریاں توں وی اچا اے  
 کیدو اگے اوہدی ذات ای کیہہ اے  
 نگلی جی اوہدی اوقات ای کیہہ اے  
 ایس لئی پئی کیدو کسے دادِ ثمن نہیں  
 کیدو گل زمانہ اے --- !!

اُچے اُچے محل چبارے  
 میرے گھر دیاں کنڈاں نیں چلے ہوئے نیں  
 کیدو ایناں دار کھوالا  
 کیدو میرا وی رکھوالا  
 میں کسراں کیدو دی گل نوں موڑاں  
 میں ایہہ جان دی آں  
 کیدو میرے گھر دیاں کنڈاں توں وی اچا اے  
 میریاں ماپیاں دی اچیاں کیدو دی اچیاں نال ای رہندی اے  
 جے کیدو ناں گھر وچ ہووے  
 میرے ماپیاں دی اچیاں رہندی نہیں  
 کیدو جیہڑا میری عزت دار کھوالا اے  
 اوہدی گل نوں چھڈ کے  
 میں کیوں را بنجھن دی گل منہاں  
 را بنجھن میرے محل چبارے توں تے اُچا ہوئیں سکدا  
 میں تے آپ وی اپنے محل چبارے کولوں چھوٹی آں

ایس بے دردی ویلے اندر دُکھ سُکھ کون ونڈائے  
 کنہوں اینی وسہل، سراں توں پنڈ غماں دی لہاے  
 کیہڑا ایناں ویہلا، دو بے دل وچ جھاتی پائے  
 ۶ تھے سچے ساک نیں کیہڑے، توں ای دس نی مائے  
 نفرت والا رنگ چڑھایا ساڈیاں ساکاں ستاں  
 دس نی مائے ہور میں کنا دُکھ دا چرخہ کتاں

جیہڑے کسے دے کم آ جاوَن بھگتن ہور پھٹیکاں  
 کر لیا اپنی ٹورنوں ہور ای ایتھوں دے وسنیکاں  
 ونڈی جاوَن راج سماج نوں دلاں چہ مار کے لیکاں  
 سانہوں چھڈیا کسے نہ جوگا طعنے مار شریکاں  
 چُگی ویریاں اُت تے ماریاں گیاں ساڈیاں مٹاں  
 دس نی مائے ہور میں کنا دُکھ دا چرخہ کتاں

## ویلے دا پرچھاواں

دس نی مائے ہور میں کنا دُکھ دا چرخہ کتاں  
 رُوں دے وانگوں اُڈ اُڈ جاوَن کچیاں کنڈاں چھتاں  
 سوت دی اُٹی مُک جاوے تے رہن نہ اکھ دیاں رتیاں  
 ساڈے دل دا مان نہ رکھیا ساڈے ساہواں ستاں  
 اوڑک پیارنوں مار کے چھڈیا درد دے پانی پتاں  
 دس نی مائے ہور میں کنا دُکھ دا چرخہ کتاں

ایس ننگے اسمان دے پٹھاں دُنیا ننگی لگے  
 ہر بندہ دو بے بندے نوں سداں وانگوں ٹھگے  
 حال غریباں دا، جیویں سہمکن تریائے ڈھگے  
 سراں چہ کھیہ پیراں وچ چھالے گلاں چہ پائے جھگے  
 ویکھ کے ٹٹے دل تے ٹٹیاں بانہواں، ٹٹیاں کتاں  
 دس نی مائے ہور میں کنا دُکھ دا چرخہ کتاں



جو کج ایہہ منگن، لیہناں دی جھولی پا ویئے  
 چنگا نہیں جے ماپیاں کولوں دھیاں رُس کے جان  
 چڑھدے سُورج درد وچھوڑا ڈسدا جُسے نوں  
 رات پوے تے ناگ بجر دے مینوں آن ڈران  
 جیہدے پٹھ گزاریاں ٹھنڈیاں چھاواں پیار دیاں  
 رہ گئے نہیں ہُن مائی اوس ٹالی دے سُلے ٹاہن



عشق دی مٹلی مار کے اوہنے کڈھ لینی سی جان  
 چنگا ہویا کیتا نہیں میں اوہدے ول دھیان  
 سوچدی آں میں فیر اوہ کے داسر کیہہ بکے گا  
 بھکھا ننگا آپ جے ہووے ویلے دا سلطان  
 سچی گل اے فضل خدا دا کتھوں تیک رہوے  
 جے ناں رکھے اتھے کوئی کدے کسے دا مان  
 شکر دوپہرے اپنے گھر دیاں کچیاں کنڈاں تے  
 راتاں دا پر چھاواں پڑھ کے ویکھاں ول اسمان



ایہہ ساڈھے ہمسائے نہیں تے ماں پو جائے نہیں  
 خورے کنہاں نفرت والے تیر چلائے نہیں  
 ساڈھے غم دیاں راہواں اندر رات دے تارے وی  
 نہرے لے کے چڑھدے سورج وگلوں آئے نہیں  
 ایویں عمر گزاری رو رو اپنیاں لیکھاں تے  
 اسیں تاں اپنی اکھ دے موتی آپ گنوائے نہیں  
 جنہاں نوں میں اکھاں دی رشنائی جانیا سی  
 اوہ وی تیریاں یاداں والے گوڑھے سائے نہیں



جیہڑے لہینوں لہو دیندے سن، اوہ بھجسے ڈیہہ گئے نہیں  
 ایس دھرتی تے ساڈھے ورگے دلاں دے ہولے رہ گئے نہیں  
 کچیاں تنداں نال کدی ناں جڑیاں کنداں پیار دیاں  
 میں کیہہ آکھاں، ایہہ سچی گل سچھے سیانے کہہ گئے نہیں  
 شکلاں جنہاں روز وکھائیاں نویاں میرے دیس دیاں  
 مائی اوہ وی جھگ دے وانگوں پانی اُتے بیہہ گئے نہیں



ساڈی عمر دیاں خوشیاں وی نال ای لے گئے نیں

اسیں تاں جیہڑے دن وی تیرے ناویں لائے نیں

توں کیہہ جانے ہک جھلی ٹیار نے تیرے لئی

کنڈیاں اندر رہ کے پیار دے پھل اُگائے نیں

جے ناں دل دی سانجھ رہوے تے کیہہ دسیے مائی

کون ایس دھرتی تے اپنے نیں کون پرانے نیں



لیہناں نیں اوڑک مُک جانا دل دیاں لکھتاں نال

ککھوں تائیں خُردے جائے خالی ورقیاں نال

کالہیاں ویکھ کے سولاں وانگوں سینے وجدے نیں

خورے اوہنے کیہہ کر دیتا ساڈیاں ساہواں نال

دُکھاں ساڈے آل دوالے راہواں بھریاں نیں

منزل کاہدی ساڈا ساتھ اے ڈھونگے پینڈیاں نال

توں ای لیہنوں ساڈے دل توں کھرچن لگ پیا ایں

اسیں تاں تیرا ناں لکھیا سی بوہت ای چاہواں نال

اوہ وی ایس دُنیا داری دے اندر رُجھ گیا  
جنہوں اپنے رب توں منگیا آس مراداں نال

درداں والیاں اوہنے فیر دکھائیاں تعبیراں  
اوہنے فیر دھرو کر چھڈیا ساڈیاں سفنیاں نال

پیارا چہار کے میرے دل تے بھیداے گھلایاے  
جندڑی ہوندى ماں دے نال تے مان بھراواں نال

ساہنوں چھڈ ڈالے ساڈے ساہوی کڈھ لئے نیں  
ایدھاں تے کوئی نہیں کردا مائی اپنیاں نال



دیوے دی جے تھی تھی لو ہندی  
سچ کہنی آں چھیتی سَجری پو ہوندى

آ جا مڑ کے پیا وفا دیاں راہواں تے  
میتھوں نہیں اے پنڈ غماں دی ڈھو ہوندى

تینوں ویکھ کے وی میں مُورکھ آکھیا نہیں  
آکھ ای دیندی بھاویں ہوندى جو ہوندى

انکھ دے مارے مار مکا ندے ہیراں نوں  
جے اے ساری دُنیا ای کیدو ہوندى





دکھاں نال ایناں بھر گئی آں  
خوشیاں آئیاں تے ڈر گئی آں

لنگی ساں کیہڑیاں تھلاں توں  
جندی جندی میں ہر گئی آں

کیہہ مینوں پتا سی بے دھیانے  
میں اوہدیاں گلاں کر گئی آں

اوہ میرے بغیر جی رہیا اے  
میں اوہدے بغیر مر گئی آں

چیندے جی ناں مرجاندی میں جان دی آں  
جے ایہہ چاہت تیتھوں ہور لکو ہوندی

ایس جگ اندر کنہی سوکھی رہندی میں  
باہروں اک تے بھاویں اندروں دو ہوندی

مائی جے ناں ہوندی ڈور دی کچی تند  
اینی چھیتی پیار پتنگ نہ بو ہوندی

یاداں دے چہاں چہڑ دے رُڑ دے

اکھیاں دے چہاں چہ تر گئی آں

ویلا جے اوہدا ناں اے مائی

ویلے توں کاہنوں ڈر گئی آں



مُک گیا بھاویں پینڈا ساڈیاں ساہواں دا

ساڈی ذات ناں چھڈیا مان بھراواں دا

تپدے ویلیوں ٹھنڈیاں واواں منگدے نیں

پر نہ جانا کسے نے درد ہواواں دا

توں وی ایس دنیا دا ہو کے رہ گیا ایں

چھیتی چھیتی پندھ مُکا کے چاہواں دا



وہیاں سڑ کے ٹھنڈیاں چھاواں دیندیاں نیں  
مائی کوئی دیکھے جگرا ماواں دا  
گلے گلاوا پا کے مائی کیہہ لبھیا  
عشق تے سارا روگ اے دل دیاں ہاواں دا



پنڈ عملاں دی کھولے کون  
ہن اینا سچ بولے کون  
اک دو بے دے ہو کے دی  
اینّا دُکھ سُنکھ پھولے کون  
سانجھ دے وٹے لبھدے نیں  
درد دلاں نوں تولے کون  
لے گیا میری جندڑی توں  
میرے پیار پٹولے کون



اسیں وی کیہڑے روگ اوڑے پالے نیں  
پیار دے ویری ساڈے آل دوالے نیں

ظلم دی کوئی حد نہیں  
سارے چپ نہیں بولے کون

لگدا جاوے دنیا توں  
دل پرچھتی اوہلے کون

دل اک اوکھی گنجبل اے  
اوکھی گنجبل کھولے کون

مائی اوس مورکھ دے لئی  
پیار دے اتھرو ڈولے کون



کیتا عشق تے عشق چہ اوڑک مرنا پیندا اے  
سوئی وانگوں وگدا دریا ترنا پیندا اے

بھاویں کنہا اُچّا اُڈیے پیار فضاواں وچ  
دُنیا توں تے فیر وی بیبا ڈرنا پیندا اے

عمر نبھانی پے جاندی اے بے قدراں دے نال  
پیار لئی ایہہ اوکھا کم وی کرنا پیندا اے

چڑھدے سورج پٹھہ اُسارے خواباں دے جے محل  
راتاں دے جگراتیاں ہتھوں ہرنا پیندا اے





غیراں نال بے رل مل جائے اپنیاں نال وگاڑی دانیس  
اک اپنا غصہ کڈھن لئی کسے دا باغ اجاڑی دانیس

پیار دا زخم اے، بھر دیاں بھریاں اوڑک ساہواں ٹٹ جانا اے  
اپنی چھیتی بھر جاوے گا، ایہہ کوئی پھٹ گہاڑی دانیس

اسیں تے اپنی پوری عمر ای تیرے ناویں لا دیتی اے  
توں ای دس قصور ایہہ سارا ساڈی قسمت ماڑی دانیس؟

ہجر دے پھٹ جے کھل جاوے تے کھل جانا اے بھید دلاں دا  
ایناں دی اپنے جیسے نوں ہنجاوے دی اگ ساڑی دانیس

چل کے پیار دی راہ تے فیر اوہ منزل آوندی اے  
اپنا بھل کے غیر دا بھانڈا بھرنا پیندا اے

بندہ بندے دا دارو اے، کیمہن سیانے لوک  
کدی کدی فر بندے توں وی ڈرنا پیندا اے

جان دی آں میں مائی لہنوں توڑ چڑھان دا مل  
پیار اچ نگی جی گل توں وی ڈرنا پیندا اے

دھرتی ول دھیان جے کرئیے اپنا آپ وی اوپرا لگے  
 کدی وی ایناں پیار دی پیگنوں اسماناں تے چاڑھی دانہیں  
 عشق دا ڈھونگا پیٹا جا کے حشر دیہاڑے ای ملے گا  
 اک واری فر سوچ لے مائی، کم ایہہ چار دیہاڑی دانہیں



ہجر دے غم تے پیار دے دکھ میں کیہہ دسناں  
 تیتھوں اپنی ہار دے دکھ میں کیہہ دسناں  
 جیہڑی باہر دے بوہے نوں وی ترس گئی  
 گھر دی اوس دیوار دے دکھ میں کیہہ دسناں  
 میں تے اپنا آپ لگانی پھر نی آں  
 تینوں اپنے گھار دے دکھ میں کیہہ دسناں  
 تیریاں گلاں کر کر شیشہ ٹٹ گیا  
 کلبے ہار سنگھار دے دکھ میں کیہہ دسناں



پکاں وچوں تیریاں خوشیاں لبھن لئی

مینوں طعنے مار دے دُکھ میں کیہہ دساں

سینے اندروں روز کلیجہ کڈھ دا اے

روز نویں اخبار دے دُکھ میں کیہہ دساں

جیہڑی گھر دا چلھا بالدی سڑ گئی اے

مائی اوس ٹیار دے دُکھ میں کیہہ دساں



طعنے مار کے ماریا کٹیاں ہیراں نوں

پچھے کون ایہہ پیار دے بدرنیراں نوں

جگراتے وچ سُفنے ویکھن والے وی

دن وچ لبھدے پھر دے نیں تعبیراں نوں

دل دی گل سُنان دا دل کیہہ آوے گا

بُجھیاں ہوئیاں ہتھاں دیاں لکیراں نوں

سچ پچھیں تے رہیا نہ ملن دا کوئی چاء

ساڈے دل دے درداں لئی اکسیراں نوں

ہاسیاں دے سب لوک پجاری لگدے نیں

کسے نہ ڈٹھا درد دیاں تصویراں نوں

جہے دُکھ دیتے اوے نے پڑھیا نہیں

دُکھاں بھریاں میریاں ایہہ تحریراں نوں

جے ہُن اوہیو مائی ساتھوں رُس گیا

خالی بیہ کے روئے کیہہ تقدیراں نوں



خورے کیہڑا ویر کمایا مار کے دل وچ گھنڈ

ساڈے بوہے سٹ گیا اوہ ہجراں والی پنڈ

نکے ہوندیاں ساریاں گلاں چیاں لگدیاں سُن

وڈے ہو کے سمجھ ایہہ آئی، دنیا نری پکھنڈ

جے ایہہ دنیا داری اے تے ایتھوں تک ای رہ!

نہیں تے کٹھی رہ جاویں گی، سچا پیار نہ ونڈ

اپنا آپ گنوا دیندا اے بندہ جنہاں لئی

اوڑک اوہو کولوں لنگھ چاندے نیں کر کے کنڈ



بھیڑاں اندر وی اوہ بندہ گلا لگدا اے  
اکلاپے دی سانجھ تے جیہدی عمر گئی اے ہنڈ

دل وچ سچا پیار نہیں تے اُچے بول نہ بول  
اج تائیں تے کسے نہ ڈٹھی شہد توں مٹھی کھنڈ



کیہہ ہو یا جے پے گئے نویں پواڑے نیں  
عشق نے وڈے وڈے سولی چاڑھے نیں

مٹ دے جاوَن اکھڑ سانجھ پریتاں دے  
بھلدے جاندے لوکی پیار پہاڑے نیں

سچ دی پرہیا اندر خورے کیہہ ہو یا  
جھوٹے لوکی سوتے مار کراڑے نیں

جھوٹے مان دھران تے جھوٹھی غیرت لئی  
کم ذاتاں نے کوٹھے جھگے ساڑے نیں

جیہڑا تیرا دردی نہیں سی اوہنوں لبھدی ساں؟  
پے گئی اے ہُن مائی اوہنوں ویکھ کے دل نوں ٹھنڈ؟

کر دے نیں اوہ گلاں راج سُدھار دیاں  
جہاں لوکاں وِس دے شہر اجاڑے نیں

اسیں وی کیہہ آں پیار دی راہ تے ٹر پئے تے  
دُنیا والے سارے کم وگاڑے نیں

جہاں مینوں جیون توں آتر کر چھڈیا  
مائی میرے اپنے دل دے ہاڑے نیں



ویکھیں کدھرے ودھ نہ جاوے دُکھ دا پینڈا ہور  
ہتھ کسے دے آناں جاوے ساڈے دل دی ٹور

ورھیاں توں ایہہ سُن دے آں چوراں نوں پے گئے مور  
چوراں نیں وی اپنی گھل چڑھائی نوں نکور

اندر والا میل تے تیریاں اکھاں دس دِٹا  
بھاویں جسے بچ گیا اے کپڑا چٹا کور

اپنے آپ نوں ایویں دھوکھا دین دا فیدا کیہہ  
کسے داکدی وی دل تے اُتے چلیا نہیں جے زور



و کچھ نی کڑیے پیار دے راہیں کدی نہ پندی خیر  
دل دا درد نہیں جاند، بھاویں کنا کریں کلور

گل تے ساری عملاں اُتے جا کے مُکدی اے  
بھاویں پکی ہووے، بھاویں کچی ہووے گور

مائی سارا جگ پُچپ اے جے اوہنے چُلی اُت  
میرا دل کیہہ دھڑکیا سارے جگ وچ پے گیا شور



ماڑی قسمت دے دیندی اے عُمر اں دے اکلا پے  
ملن تو بعد جے کلہا رہنا، کلہ دے میل ملا پے

دل دے نیڑے آ جاوے تے لگدا اے کج ہو رای  
اُنج تے ہر بندہ ای وانگ فرشیاں دُوروں جا پے

غیراں ساڈے نال جو کیتا سبھے لوکی جان  
ساڈے نال فر اپنیاں نیں وی پائے کئی سیا پے

دھیاں نکیاں ہون تے لگن آپ پٹولیاں وانگوں  
وڈھیاں ہون تے فیر پٹولے بن جاندے نیں ما پے

ساڑھ سواہ کر دیندی اے تے پلے کج نہیں چھڈ دی  
کملی کوہی عمر اچ کوئی عشق دی اک نہ تا پے

جے ناں اوہ مڑ آوے تے فر اپنے دل دارا نہجا  
مندر پا کے وانگ فقیراں بن دی جاواں آپے

دل دامیل تے سچا پیار ای لاء سکدا اے مائی  
صابن جے نہ پائیے تے کیہہ کپڑے دھوون تھا پے



حق سچ دیاں گلاں کردے ساں؛ حق سچ دا مان ودھایا سی  
پر کیہہ دسیے؛ ایس گل اُتے جگ نے کیہہ ویر کمایا سی

جے سچے پیارنوں مَن دا نہیں تے اوہدے دل دی مرضی اے  
اوہ ہُن وی شرماں والا اے اوہ پہلے وی شرمایا سی

مینوں ماریا اوہدیاں سوچاں نہیں؛ مینوں ساڑھیا اوہدیاں یاداں نے  
اک دن تے اوہدا پر چھاواں سورج دی اکھ وچ آیا سی

کیہہ دساں اوہدیاں اکھاں وچ اوہ کیہڑا جادو سی جہے  
سینے وچ میرے دھڑکدے دل نوں بلھے وانگ نہایا سی



## وچار دی گل

خورے کیہہ اے  
 اکھستانی، بھری جوانی، گل سیانی  
 کل خورے کیہہ لین اوہ آیا  
 کیہہ گل مینوں آکھ گیا اے  
 عشق دلاں وچ جھگی پا کے بیہہ جاند اے  
 لبہدے اگے دل دا ہولا ڈھیری ڈھا کے بیہہ جاند اے  
 راہ وچ لنگھن والیاں سارے راہیاں نوں اوہ  
 دکھڑا پنا روز سنا کے بیہہ جاند اے  
 خورے بند اکھہ چاہند اے  
 عشق اوہنوں کیہہ کہہ جاند اے  
 ایہو گل فر سوچدیاں سوچدیاں  
 چڑھدے پاسیوں دن داسو رنج لیہہ جاند اے

اوہ دن وی کئے چنگے سن، جیہڑے لنگھ کے وی ناں لنگھے سن  
 میں ڈر گئی دل دیاں تاہنگاں توں ویلے نے ہو ر ڈرایا سی  
 جے اپنی عمر گزاری اے، ہتھ لیکھاں دی پھل واری اے  
 کیہہ پچھدے او ایس جگ نے وی تے وکھرا رنگ دکھایا سی  
 مائی اے خبر نہیں سی دل نوں سولاں وانگوں ڈنگدا اے  
 کیہہ پیار نے تینوں دیتا اے کیوں ایناں پیار توں پایا سی

کیہڑا تیرے اُتے ہُن اتہار کرے ایس جگ دے اندر  
 جیہڑا تیرا دشمن نہیں سی اوتھے وی کم پا دتا ای  
 خورے کاہنوں ساڈیاں فصلاں بخر کرن دا چاء سی تینوں  
 قبضے کر کے وگدیاں نہراں ساہنوں زہر پیار دتا ای  
 وکھ لہیں ایہہ تیرے محل چپارے وی ہُن رہ نہیں سکدے  
 کمزورواں دیاں سدھراں والا پورا شہر ہلا دتا ای

## اک وڈی طاقت دے ناں

ایہہ کیہہ کم وکھا دتا ای ایہہ کیہہ رولا پا دتا ای  
 اپنی جھگی پاؤن لئی توں اڈھا جگ مُکا دتا ای  
 کوئی دل دا بھید نہ کھولے تیرے اگے کیہڑا بولے  
 پکے ڈھا کے کچے کوٹھیاں کنڈاں نوں وی ڈھا دتا ای  
 بھانویں رب توں اسیں نہیں ڈردے تیرے کولوں ڈر جانے آں  
 اسیں ڈراکل پہلے ای ساں کجھ ساہنوں ہور ڈرا دتا ای  
 غیراں نال تے خیر کسے نوں خیر دی کوئی آس نہیں ہوندی  
 جیہڑا تیرا بچن سی توں اوہنوں ای مگروں لا دتا ای



ماں اوہ لفظ اے  
جیہڑا ہونٹھاں تے آوے تے  
اکھیاں اندر ہاسیاں والے پھل کھڑے جاندے نیں  
ساہواں اندر خوشبوواں دانور  
خیال ہنیریاں نوں چائن دیندا اے

ماں اوہ لفظ اے  
جنہوں سن کے  
سینے اندر ٹھنڈ پے جاندی اے  
میں نیں جان دی  
خورے ماں نوں کیہڑی مٹی نال بنایا اے  
خورے ماں نوں کیہڑے صبر داپانی دتا اے  
کیہڑیاں پیار ہواواں نے اوہدے جسے دی اگ نوں  
ایناں ٹھنڈا کیتا اے  
پئی دھپاں سڑ دی دھرتی اُتے اوہدے پیار دی  
ٹھنڈی چھاں ہو جاندی اے

ماں

شکر دوپہرے گرمی اندر  
دھندیاں ہو یاں چندری والیاں راہواں اُتے  
ننگے پیریں ٹردی جاواں  
اپنے دل دے ور قے اُتے  
مٹھے مٹھے حرفاں والا  
اگوناں میں لکھدی جاواں  
ماں داسو ہنا ناں  
ماں اوہ لفظ اے  
جنہوں رب نے  
پیار محبت تے قربانی دے لفظاں توں ودھ کے عزت دتی اے

میری ماں وی اوہناں ماواں چوں اک ماں سی

پیار دی ٹھنڈی چھاں سی

ہُن اوہ چھاں مینوں نہیں لبھدی

شکر دوپہرے گرمی اندر

ننگے پیریں ٹردیاں ٹردیاں

خورے کئے ورہیاں دا پینڈا کر کے میں آ گئی آں

تے کئے ورہیاں دا ہُن پینڈا رہ گیا اے

## تن شعر

توں آکھیں تے بُہیاں اُتے چپ دے جندرے لا لینے آں

توں آکھیں تے کلہے بیہہ کے پیار دے نیر وگا لینے آں

جگ دے کولوں پَنڈ سراں تے لے لینے آں دُکھاں والی

اسیں تاں آپ ای اپنیاں لیکھاں اندر گنجبل پا لینے آں

عشق دی پیڑ دا دارو ساہنوں کسے طبیب نے کیہہ دینا اے

اسیں تاں روز ای اپنے دل دے ویدنوں نبض وکھا لینے آں



کسے دے سینے تاہنگ نہیں سی بغض کدورت والی  
 سمھناں دے دل شیشے وانگوں حرصاں توں سی خالی  
 شرم حیا تے غریتاں والے گھر گھر نظریں آون  
 اک مُک ہو جان دے سُن جیہڑے پگ نال پگ وٹا وٹا  
 سُنی سنائی گل نہیں، ایہہ خود دیکھن وچ آئی  
 گھر دیاں کچیاں کنڈاں اندر رشتیاں دی پکیائی  
 شہرہ دیاں راہواں تے جد اسماناں دھوڑاں پٹیاں  
 کچیاں کنڈاں ساریاں کپے ساکاں والیاں ٹٹیاں  
 اک دوجے نال مُک گئے سارے دلاں دے میل ملاپے  
 چار چنیرے نویاں تاہنگاں پائے نویں سیاپے  
 کپے محل چباریاں اندر رشتے رہ گئے کچے  
 نفرت والی بالکنی نے کھا لئے پیار چچے

## نویں ویلے دی قید

تہینہ ورہیاں کچھے جائے تے اکھیاں ہنجواں ڈُبن  
 نکلیاں نکلیاں یاداں والیاں من وچ سولاں گھٹن  
 اکھاں اگے سفیاں وانگوں منظر رنگ دکھاو  
 پنڈ دے باہر لے کھوہ تے پنڈ دیاں ٹیاریاں آون  
 ہسڈیاں، ہسڈیاں، ککلی پاندیاں سوہنیاں جاندیاں ویکھاں  
 اپنے سوہنے ویراں دے میں سہرے گاندیاں ویکھاں  
 نِکے نِکے دلاں چہ مارن آس مُراداں چھلّاں  
 اوہ کیہہ جانن اُچے محل چباریاں والیاں گلاں

جنہوں سُن کے دل نے تیری تاہنگ جگائی سی  
 جی کردا اے تینوں اوہو گیت سناواں میں  
 پیار دے بھندے تاپ اندر وی ہر ویلے مائی  
 ٹُردی پھردی آں لے کے اوہدا پرچھاواں میں



پیار محبت دی اگ اندر بلدی جاواں میں  
 لیکھ ای جے ایہہ لکھے نہیں، کیہہ کراں دعاواں میں  
 پچھلیاں وقاں دا تینوں کیہہ حال سناواں میں  
 ہُن تے ایہوای جی کر دا اے، لُگ چھپ جاواں میں  
 توں تے اج وی پہلے وانگوں درد سندیسہ ایں  
 خورے تیرے لئی کیوں کٹیاں پیار مزاواں میں  
 تیرے باہجوں رہ نہیں سکدا کلم کلہا دل  
 توں ای دس ہُن کسراں ایس دل نوں پرچاواں میں



## گیت

میں دل نوں ایہہ سمجھانی آں — اوہنوں بھل وی جا  
میں ترے سو سو پانی آں — اوہنوں بھل وی جا  
ایہہ یاداں کچھ نہیں دیندیاں، ایہہ تڑپا ندیاں نہیں  
ایہہ سوچاں سدھراں اندر بھانیر لاندیاں نہیں  
اگ ہنجواں نال بھجانی آں — اوہنوں بھل وی جا

ایہہ سچ اے، پیار دا موہرا آپے چکھیا سی  
اوس بے دردی نوں آپے دل وچ رکھیا سی  
ہُن آپے میں پچھتانی آں — اوہنوں بھل وی جا  
میں دل نوں ایہہ سمجھانی آں — اوہنوں بھل وی جا

## تین شعر

ورہیاں دا ہڑ لنگدا جاوے  
ویلا جُسا ڈنگدا جاوے  
ساہنوں تیرے ہجر دا موسم  
سُلی اُتے ٹنگدا جاوے

من ساڈا تیری چاہت نوں  
وانگ فقیراں منگدا جاوے

نہیں سوچیا سی ایہہ پیار بنے گا روگ کدے  
میں کلہیاں بیٹھ مناواں گی ایہہ سوگ کدے  
ہُن ایویں پئی کرلانی آں — اوہنوں بھل وی جا  
میں دل نوں ایہہ سمجھانی آں — اوہنوں بھل وی جا

## گیت

اساں دل دا حال نہیں کہنا، بھاویں رُل جائے  
اسیں کلم کلہیاں رہنا، بھانویں رُل جائے  
دل دا راز کسے نوں دس کے مڑ پچھتانا نہیں  
گل اپنے بدنامی والا طوق تے پانا نہیں  
دل وانگوں اسیں نہیں ڈیہنا، بھاویں رُل جائے  
اسیں کلم کلہیاں رہنا، بھانویں رُل جائے



گل دل دی دل وچ رہوے تے بڑا خزانہ اے

جے ہونٹھاں وچوں نکلے تے افسانہ اے

ہر دُکھ نوں کھیا سیہنا، بھانویں رُل جائیے

اسیں کلم کھیاں رہنا، بھانویں رُل جائیے

وَدھ جاندا بھار ودھیرا جے گل دسیے ناں

نہیں چنگا ہوندا، جے رُل مل کے ہسیے ناں

اساں پا لیا غم دا گہنا بھانویں رُل جائے

اسیں کلم کھیاں رہنا، بھانویں رُل جائے

## نانک جی

انساناں نال پیار کرن دا اوہناں وَل سکھایا

مٹی دے ہر ذرے نوں اوہناں اسمان بنایا

نانک جی نے دسیا، نکے وڈے دی گل چھڈو

من وچ پیار وساؤ مترو! بغض کدروت کڈھو

نانک جی نے دسیا، سچ دی راہ تے چلنا چنگا

جیون انج سنوارو جیویں والاں والا کنگھا

جتھوں حق سچ لبھیا اوہناں، آپ عمل وی کیتا

وحدت والا پیالا اوہناں آپ وی رنج رنج پیتا

اوہناں دین اسلام دی وی وڈیا ئی سبھ نوں دتی  
اوہناں آکھیا، اک خدا دی پھر لوگھٹ کے رسی

کعبے دے وی درشن کیجے، کلمہ وی من بھایا  
سبھ لوکاں دے زخماں اُتے رکھیا امن دا پھایا

نانک جی نے صفتاں والا لیا محمد نام  
”سرسری اکال“ اے ساڈا رب بھگوان تے رام

وَسَّے مسجد کعبہ ساڈا، وَسَّے گورو دوارا  
وَسَّے ساڈے دل وچ مائی پیار تے بھائی چارا



پہلی پہلی وار ہجر دا بھانبر دل وچ بلیا اے  
فون کسے ناں کیتا مینوں کسے ناں پتر گھلیا اے

توں ای دس میں اگو ناں کتھوں تیکر لکھدی جاواں  
ایسے لئی تے درد کتاب دا اگلا ورقا تھلیا اے

اج جے کوئی کسی ہیر ملے تے اوہنوں دساں میں  
اج وی عورت ذات نے کیویں قہر جبر نوں جھلیا اے

چن جھلا اے کلہا کھجھل ہوندا پھر دا راتاں نوں  
سورج وی کچھ لبھدا لبھدا اُفتق دوارے ڈھلیا اے



کہندے نیں پئی سُرخ گلاباں والا موسم آوے گا  
فیر ایہہ شکلاں اُتے کنہے رنگ خزاں دا ملیا اے  
مائی میرا دل وی کیہہ اے رہندا اوہدیاں یاداں وچ  
انج لگدا اے ایہہ وی اوس بے دردی نال ای رلیا اے



شام پوے تے پیار دی پیڑ پرانی، ہو کے بھردی اے  
دل دریا وچ ہُن وی تیری یاد دی پیڑی تردی اے  
نکی جی سی جدا اوس نے اک لاش سڑک تے ویکھی سی  
وڈی ہو گئی دھی میری پر اُجے وی کلہیاں ڈردی اے  
دھی ہووے یا بہن کسے دی، یا فیر اوہ ماں بن جاوے  
ہر رشتے وچ عورت اے تے عورت ای دُکھ جردی اے  
بدل گھیاں نیں پہلیاں قدراں، پیار دیاں سبھ رسماں وی  
خورے کاہنوں روز ای اوہ بٹے تے دیوا دھردی اے

## اپنے دیس لئی کجھ شعر

اے گل سچ اے مُلکاں اندر مندے لوک وی ہندے نیں  
بھیڑیاں سوچاں فکراں والے گندے لوک وی ہندے نیں

رہبر چنگا ہووے تے فیر قوم مثالی ہوندی اے  
ایس مثالی قوم دی شو بھا ساری دنیا مندی اے

قائد نے اک مُلک وی دِتا، نالے قوم بنائی سی  
سرِ نوں اُچا کر کے زندہ رہن دی گل سمجھائی سی

پیار وطن دا، اوہنے قوم دی نس نس دے وچ بھر دِتا  
پیار وفا دے جذبیاں نال دلاں وچ چائن کر دِتا

ایہناں جذبیاں ایہناں سوچاں نوں اسیں قائم رکھنا اے  
قوم وطن دے مان نوں مائی جگ وچ دائم رکھنا اے

ایہہ کوئی میرا قصہ نہیں، قصہ اے میری سہیلی دا  
جیہڑا اوہنوں بھل بیٹھا، اوہ اے جیہڑا دی اوس تے مردی اے

مانی کیہہ لبھدی پھر دی ایس پیار و فادیاں گلہاں نوں  
کون کسے دا سجن اے، ہُن کون کسے دا دردی اے